

27.06.2025

आकाशवाणी जयपुर—अजमेर  
प्रादेशिक समाचार

1850 बजे

- मुख्यमंत्री भजन लाल शर्मा प्रदेश ने साढे 300 बिलियन डॉलर री अर्थव्यवस्था बणावण सारू शिक्षा, कृषि अर उद्योग हलका मांय आधुनिक तकनीक ऊं बदलाव माथे ज़ोर दियो।
- राष्ट्रपति द्रौपदी मुर्मू एम.एस.एम.ई. ने विकास रो मजबूत तंत्र बताया।
- चिली रो उच्च थर रो नुमाइन्दा मण्डल खेतडी कॉपर प्रोजेक्ट रो दौरो कर्यो—दोन्यू देशां रे बीचे खनन हलका मांय तकनीकी आदान—प्रदान अर भेळा सिखावण कार्यकमां माथे सहमति बणी।
- प्रदेशभर मांय मॉनसून री सक्रियता ऊं बंधां मांय पाणी री चोखी आवक—चम्बल नदी माथे बण्या तीन्यू बंधा लबालब।

000

मुख्यमंत्री भजन लाल शर्मा कह्यो के राज्य सरकार प्रदेश ने साढे 300 बिलियन डॉलर री अर्थव्यवस्था बणावण सारू केई पहल कर री है। ई सारू शिक्षा, कृषि अर उद्योग हलका मांय आधुनिक तकनीक ने काम मांय लेवता केई बदलाव लाया जावे। श्री शर्मा आज मुख्यमंत्री निवास माथे खेती हलका मांय सुधार, नौजवानां ने रोजगार देवण जोग सिखावण अर मल्टीमॉर्डल लॉजिस्टिक्स पार्क विकसित करण रा बारा मांय व्ही मीटिंग मांय बोल रिया हा। मुख्यमंत्री कह्यो के खेती मांय एआई ने बधावो देवण ऊं ई हलका री चुनौतियां ने दूर करी जा सके है। मुख्यमंत्री नौजवानां ने फ्यूचर रेडी—इण्डस्ट्री रेडी बणावण सारू हुनस सिखावण माथे ज़ोर दियो। वणा अहलकारां ने विश्व थर रा रुजगार देवण जोग सिखावण सारू सगळा जरुरी कदम उठावण रा निर्देश दिया। श्री शर्मा कह्यो के राज्य मांय निवेश मुजब औद्योगिक वातावरण तियार करण सारू असरदार कदम उठाया जावे। औद्योगिक हलका मांय लॉजिस्टिक्स लागत मांय कमी लावण अर कनेक्टिविटी ने बधावो देवण सारू राजस्थान लॉजिस्टिक पॉलिसी 2025 लागू करी ज्यी है।

000

राष्ट्रपति द्रौपदी मुर्मू देश रा आर्थिक विकास सारू मजबूत एम.एस.एम.ई. तंत्र ने जरुरी बताया है। वणा कह्यो के सूक्ष्म, लघु अर मध्यम उद्यम अर्थव्यवस्था रो मजबूत थांबो है। आज नुवी दिल्ली मांय अंतर्राष्ट्रीय एम.एस.एम.ई. दिवस ज़ब्सा मांय बोलता वणा कह्यो के ई हलका रो देश रा सकल घरु उत्पाद मांय कोई तीस फीसदी, विनिर्माण हलका मांय 36 फीसदी अर निर्यात मांय 45 फीसदी रो योगदान है। राष्ट्रपति मुर्मू कह्यो के खेती रे पाछे एम.एस.एम.ई. हलको देश मांय सब ऊं बत्ती रुजगार रा मौका पैदा करे है।

000

भारत अर चिली रे बीचे खनन हलका मांय मदद सारू दोन्यू देशा रा नुमाइन्दा री मीटिंग व्ही। चिली री सरकारी खनन कम्पनी कोडलको री टीम आज खेतडी कॉपर प्रोजेक्ट रे तैत कोलिहान अर चांदमारी खदानां ने देख्या। दल खदान मांय गहराई ताँई जा र खुदायी रा काम री प्रणाली ने देख्या। इण रे पछे दोन्यू देशां रा नुमाइन्दा मण्डल खनन सुरक्षा, पर्यावरणीय प्रबन्ध अर संसाधन उपयोग माथे बत्तळ करी।

खेतडी कॉपर कॉम्पलेक्स रा कैमिकल विंग उपमहाप्रबन्धक जसवंत कुमार राजोरा बतायो के ई दौरान दोन्यू देशां रे बीचे तकनीकी लेण—देण अर भेळा सिखावण कार्यकमां माथे सहमति बनी।

000

पैली री केन्द्रीय मंत्री अर भाजपा नेता स्मृति ईरानी आज बीकानेर मांय आपातकाल री 50 वीं वर्षगांठ रे मौके व्ह्या कार्यक्रम मांय सिरकत करी। जळसा मांय वणा लोकतंत्र सेनानियां रो सन्मान कर्यो। खबरनवीसां साथे बतळ मांय श्रीमती ईरानी कह्यो के आपातकाल रे दौरान अभिव्यक्ति री आजादी छीनीज ग्यी ही। वणा लोकतंत्र री मजबूती सारु महिलावां री भूमिका ने महताऊ बताया। श्रीमती ईरानी महिलावां रा सामाजिक अर आर्थिक मजबूती माथे ज़ोर दियो।

000

प्रधानमंत्री नरेन्द्र मोदी रो आकाशवाणी ऊं प्रसारित कर्या जावण वालो मन की बात मासिक कार्यक्रम आवता दीतवार ने व्हेला। आ ई रेडियो कार्यक्रम री 123 वीं कड़ी व्हेला। मन की बात रो प्रसारण संवारा 11 बज्या आकाशवाणी अर दूरदर्शन रा सगळा नेटवर्क माथे प्रसारित व्हेला। साथै ई ओ कार्यक्रम आकाशवाणी समाचार री वेबसाइट, सूचना अर प्रसारण मंत्रालय अर प्रधानमंत्री दफ्तर रायू ट्र्यूब चैनलां माथे ई मुहैया व्हेला। इण री लाइव स्ट्रीमिंग ओटीटी प्लेटफार्म बेब्ज माथे ई मिलेला।

000

राज्य मांय लारलाएक हफ्ता ऊं सकिय मॉनसून अबै सगळा हलका मांय पूग ग्यो है। मौसम महकमो आज आज 23 ज़िलां मांय बिरखा रो अलर्ट काढ़यो है। इण रे साथै ई उदयपुर, जयपुर अर भरतपुर संभाग मांय बिरखा री गतिविधिया आवता एक हफ्ता तांई चालता रहवण री आस जतायी है। ई बीचे आवता दो दिनां मांय कठेई—कठेई भारी बिरखा ही व्हे सके है। पाली ज़िला रा रानी, खीमेल, विद्यावाड़ी अर आरे—सारे रा हलका मांय घंटाभर मूसलाधार बिरखा व्ही। करौली, धौलपुर, झालावाड़, जैसलमेर अर आरे—सारे रा हलकां मांय हळका ऊं मझला दर्जा री बिरखा व्ही। बारां रा केलवाड़ा मांय ई ज़ोरदार बिरखा रा समचार है।

राजधानी जयपुर मांय ई गुजरी रात रुक—रुक ने बिरखा रो दौर चाल्यो। बूंदी, बारां, झालावाड़, चित्तौड़गढ़, उदयपुर, कोटा, भीलवाड़ा, टोंक, करौली, सिरोही, प्रतापगढ़ मांय ई 1-1 सेंटीमीटर बिरखा दर्ज व्ही। लारला चौबीस घंटां मांय सब ऊं बत्ती 13 सेंटीमीटर बिरखा बांसवाड़ा रा सज्जनगढ़ मांय व्ही। ज़िला रा सल्लोपाट, वेजा, अरथूना, कुशलगढ़ मांय ई झामाझम बिरखा व्ही। इण रे अलावा झूंगरपुर, बारां, दौसा अर जयपुर रा जमवारामगढ़ मांय ई 6 सेंटीमीटर ऊं बत्ती पाणी बरस्यो। चोखी बिरखा ऊं बंधा मांय पाणी री आवक बण्योड़ी है। कोटा ऊं म्हाणा खबरनवीस बतायो के कोटा बैराज अर जवाहर सागर अर राणा सागर बंधा समेत दूजा छोटा—मोटा बंधा मांय बिरखा रो सिलसिलो बण्योड़ो है। जून मीना मांय चम्बल नदी माथे बण्या तीनू बंधा लबालव व्हे ग्या है।

000

बीसलपुर बंधा रो जल थर आज तीजे दिन ई बध्यो अर ओ 312 दशमलव 57 आरएल मीटर तांई पूग ग्यो है।

000

उदयपुर मांय आरएनटी मेडिकल कॉलेज मांय लारला दिनां करंट लागण ऊं व्ही एक डॉक्टर री मौत रा मामला ने ले र अजमेर रा जे.एल.एन. अस्पताल रा रेजीडेंट डॉक्टर आज तीजे दिन ई काम रो बहिष्कार कर्यो। अजमेर रा राजस्थान मेडिकल कॉलेज टीचर्स एसोसिएशन रा अध्यक्ष डॉ. संजीव महेश्वरी राज्य सरकार ऊं मामला री निष्पक्ष जांच करावण अर पीड़ित परिवार ने मदद देवण री मांग करी।

000

मुख्य निर्वाचन अहलकार नवीन महाजन कह्यो के नुवा मतदातावां ने जोडण अर वां मांय जाग जगावण सारू कॉलेजा मांय इलेक्टोरल लिटरेसी क्लब्स री सक्रिय भूमिका तैय करी जावे। श्री महाजन आज जयपुर मांय सुलभ चुनाव माथे राज्य संचालन समिति री मीटिंग मांय बोल रिया हा। वणा चिकित्सा, सामाजिक न्याय, उच्च शिक्षा समेत दूजा मेहकमा ने आप री वेबसाइट माथे वोटर रजिस्ट्रेशन पोर्टल रो लिंक जरुरी रूप ऊं दरसावण रा निर्देश दिया। श्री महाजन कह्यो के इण रे साथै ई महकमा कानी ऊं रहवासियां ऊं मिलण वाळी अर्जियां मांय मतदाता पंजीकरण रा बारा मांय विकल्प ई खास तौर ऊं भेळो करयो जावे। चुणाव आयोग री 'नो वोटर लेफ्ट बिहाइङ्ड' पहल रे तैत 18 साल पूरा कर चुक्या पात्र रहवासियां ने मतदाता रा रूप मांय जोडण सारू राज्य चुणाव मेहकमा कानी ऊं बरोबर कोशिश करी जावे।

000

ओडिशा रा पुरी मांय भगवान जगन्नाथ री दुनियाभर मांय नामी सालाना रथ जात्रा आज ऊं सरू व्हे री है। इण मांय हिस्सो लेवण सारू देश—विदेश ऊं लाखू सिरधालू पूर्या है। भगवान जगन्नाथ, भगवान बलभद्र अर देवी सुभद्रा री शोभायात्रा आज संवारे भक्तिभाव अर उमाव रे साथे निकाळी ज्यी। इण मांय पुजारियां कानी ऊं देवतावां रा विग्रह ने जगन्नाथ मिंदर गर्भगृह ऊं वां रा राजसी रथां ताँई लायी ज्या। पुरी री तर्ज माथे प्रदेश मांय ई भगवान जगन्नाथ री रथ यात्रा रा आयोजन व्हे रह्या है। कोटा रा जगन्नाथ मिन्दरां मांय अभिषेक अर पूजन कार्यक्रम करी ज्या। वठे ई चित्तौडगढ़ मांय निकाळी जाय री रथ यात्रा मांय 56 भोग अर नांच प्रस्तुतियां आकर्षण रो केन्द्र बणी है। राजधानी जयपुर रा गोविंद देवजी मिंदर मांय ई रथ यात्रा महोत्सव व्हयो। कार्यक्रम मांय घणी तादाद मांय सिरधालू मौजूद रह्या।

000

युवा मामला अर खेल मंत्रालय नौजवानां सारू डिजिटल सेवावां ने सरल बणावण सारू माय भारत पोर्टल और व्हट्सएप रो एकीकरण सरू कर दियो है। व्हॉट्सएप चैटबॉट अबे माय भारत पोर्टल माथे मौजूद है। ई सुविधा ने सीधा व्हट्सएप नंबर 7-2-8-9-0-0-1-5-1-5 री मार्फत ली जा सके है।

000

अंतर्राष्ट्रीय क्रिकेट परिषद—आई.सी.सी. ट्वेंटी—ट्वेंटी मैचां सारू नुवां पावर—प्ले नियमां रो ऐलाण करयो है। आवता म्हीना ऊं लागू होवण वाळां आं नियमां मुजब बिरखा खराब रोशनी अर दूजा कारणां ऊं 8 ऑवर ताँई रा करी ज्या मैच मांय अबै पावर—प्ले 2 ओवर अर दो गेंद रो व्हेला। 30 गज रा घेरा रे बारे फगत दो खिलाड़ी मौजूद रह सकेलो। इणी तरह, पांच ओवर री पारी सारू डेढ़ ओवर पावर—प्ले व्हेला।

10 ओवर री पारी मांय तीन ओवर अर 15 ओवर री पारी सारू साढ़े चार ओवर पावर—प्ले सारू तैय करी ज्या है।